



VENDIM
Nr. 557, datë 29.7.2022

PËR SHPALLJEN E EKOSISTEMIT
NATYROR DETAR - BREGDETAR TË
GJIRIT TË PORTO-PALERMOS “PARK
NATYROR”, KATEGORIA IV

Në mbështetje të nenit 100 të Kushtetutës dhe të pikës 2, të nenit 10, të ligjit 81/2017, “Për zonat e mbrojtura”, me propozimin e ministrit të Turizmit dhe Mjedisit, Këshilli i Ministrave

VENDOSI:

1. Shpalljen e ekosistemit natyror detar – bregdetar të Gjirit të Porto-Palermos “Park Natyror” (kategoria IV e zonave të mbrojtura), sipas hartës në shtojcën 1, dhe kufirit të paraqitur, sipas tabelës së koordinatave në shtojcën 2, që i bashkëlidhen këtij vendimi dhe janë pjesë përbërëse të tij.

2. Zona e mbrojtur përfshin sipërfaqe ujore/detare dhe sipërfaqe tokësore, që përfshin shkurre, tokë me bimësi pyjore, sipërfaqe kullimore, sipas tabelës nr. 1, të aneksit 1, që i bashkëlidhet këtij vendimi.

3. “Parku Natyror” i Gjirit të Porto-Palermos ka një sipërfaqe të përgjithshme prej 1 694.98 (një mijë e gjashtëqind e nëntëdhjetë e katër pikë nëntëdhjetë e tetë) ha, nga e cila: 1 490.4 (një mijë e katërqind e nëntëdhjetë pikë katër) ha ose 87.93% janë sipërfaqe detare dhe 204.58 (dyqind e katër pikë pesëdhjetë e tetë) ha ose 12.07% janë sipërfaqe tokësore, sipas përcaktimeve në tabelën, që i bashkëlidhet këtij vendimi dhe është pjesë përbërëse e tij.

4. “Parku Natyror” Porto-Palermo ndahet në tri nënzona, të pasqyruara në hartën që i bashkëlidhet këtij vendimi dhe është pjesë përbërëse e tij, si më poshtë vijon:

a) Nënzona qendrore, me sipërfaqe 424.2 (katërqind e njëzet e katër pikë dy) ha ose 25% (të sipërfaqes së përgjithshme), e shënuar në hartë me “ZQ” (269.21 ha janë sipërfaqe detare dhe 154.98 ha janë sipërfaqe tokësore).

Në këtë nënzona zbatohet shkalla e parë e mbrojtjes (strikte), pasi performanca natyrore e saj është tepër e lartë, më pak ose aspak e shqetësuar nga veprimtaritë njerëzore. Ka

përparësi ruajtjen tërësore të natyrës, të biodiversitetit, të llojeve të rrezikuara, monumentet e natyrës, të peizazhit unik tokësor, bregdetar-detar, veçoritë natyrore të jashtëzakonshme gjeomorfologjike dhe historike, pa qenë nevoja e ndërhyrjeve përmirësuese të përhershme, të cilat menaxhohen në atë mënyrë që të ruajnë gjendjen natyrore, të mbështesin lehtësimin e kërkimit shkencor dhe monitorimin mjedisor. Kjo nënzona gëzon karakterin e mbrojtjes strikte dhe detajohet, sipas përcaktimeve të bëra në planin e menaxhimit. Në këtë nënzona lejohen kërkimi shkencor, zhvillimi i veprimtarive ekoturistike të lira në natyrë;

b) Nënzona e përdorimit tradicional dhe zhvillimit të qëndrueshëm, me sipërfaqe 1263.1 (një mijë e dyqind e gjashtëdhjetë e tre pikë një) ha ose 74.52%, e shënuar në hartë me ZPTQ (1221.18 ha janë sipërfaqe detare dhe 41.92 ha janë sipërfaqe tokësore).

Në këtë nënzona zbatohet shkalla e dytë e mbrojtjes, pasi performanca e saj natyrore është e lartë, me habitate shumë të rëndësishme natyrore ose vendbanime me lloje të rralla dhe të rrezikuara. Ka përparësi ruajtjen tërësore të biodiversitetit, zonat natyrore, përfaqësues të rajoneve fiziografike dhe skenike për qëllime shpirtërore, shkencore, edukative, duke integruar menaxhimin e zonës së mbrojtur me përdorimin e qëndrueshëm e të balancuar. Karakterizohet me ekosisteme, vlera peizazhore dhe vlera të tjera të natyrës, në të cilat mund të ushtrohen veprimtari që nuk janë në kundërshtim me qëllimin e mbrojtjes dhe objektivat e menaxhimit. Lejohet ekoturizëm mjedisor dhe arsimor, sipas rregullave dhe kufizimeve të qarta, të caktuara në planin e menaxhimit.

Ka përparësi harmonizimin e ruajtjes së natyrës, të peizazhit dhe të biodiversitetit, duke bashkërenduar menaxhimin e zonës së mbrojtur me zhvillimin e qëndrueshëm ekonomik dhe social.

Nënzona, krahas zhvillimi socio-ekonomik, duhet të sigurojë dhe të ruajë kushtet e habitatit, të domosdoshme për mbrojtjen e llojeve të rëndësishme, grup-llojeve, komuniteteve biotike ose karakteristikave fizike të mjedisit, gjë që kërkon ndërhyrje njerëzore të veçanta për menaxhim efektiv. Mbështet lehtësimin e kërkimit shkencor dhe monitorimin mjedisor të



veprimtarive parësore të lidhura me menaxhimin e qëndrueshëm të resurseve natyrore. Nëpërmjet përdorimit afatgjatë të qëndrueshëm, të baraspeshuar, nënzona duhet t'u japë mundësi popullsisë lokale për të siguruar përfitime ekonomike, që nuk vijnë ndesh me objektivat e tjerë të menaxhimit. Zhvillimet urbane, të objekteve të ndryshme apo të infrastrukturës e shërbimeve, për nevojat e banorëve, të vizitorëve dhe të biznesit, kryhen në mbështetje të instrumenteve të zhvillimit, të miratuara nga Këshilli Kombëtar i Territorit (KKT) dhe sipas rregullave dhe kufizimeve të caktuara në planin e menaxhimit.

c) Nënzona e rekreacionit, me sipërfaqe 7.67 (shtatë pikë gjashtëdhjetë e shtatë) ha ose 0.48%, shënuar në hartë me ngjyrë lejla.

Në këtë nënzonë zbatohet shkalla e tretë e mbrojtjes, pasi performanca e saj natyrore është e mirë. Përcaktohet si nënzonë që përmban sipërfaqe tokësore, detare e nëndetare, e cila duhet të garantojë të mos cenohet ndërveprimi harmonik i natyrës me kulturën përmes mbrojtjes së cilësisë së peizazhit, përdorimit të vazhdueshëm të tokës, bregdetit e detit, në mënyrë tradicionale, si dhe të praktikave ndërtimore dhe manifestimeve sociale e kulturore, karakteristike të rajonit. Lejon mundësi për edukim, rekreacion në natyrë të hapur dhe nëndetar, veprimtari jomasive sportive, argëtuese dhe facilitete, që respektojnë funksionet e zonës së mbrojtur, vlerat ekologjike, peizazhin natyror e kulturor dhe të instrumenteve të përgjithshme kombëtare e vendore të planifikimit të territorit, si dhe rregullat dhe kufizimet e caktuara në planin e menaxhimit.

Zonimi dhe sipërfaqet në “Parkun Natyror”, Porto-Palermo, jepen në tabelën 2, të aneksit 1, që i bashkëlidhet këtij vendimi dhe sipas hartës në shtojcën 3.

5. Aktivitetet shfrytëzuese të burimeve natyrore, të cilat ndodhen brenda territorit të zonës së mbrojtur detare – bregdetare të Porto-Palermos dhe që janë të pajisura me leje mjedisore dhe/ ose vendim të KKT-së, deri në datën e hyrjes në fuqi të këtij vendimi, lejohen të vazhdojnë ushtrimin e aktivitetit, në rast se nuk ndalohen nga pika 3, e nenit 22, të ligjit nr. 81/2017, “Për zonat e mbrojtura” dhe përmbushin kushtet e parashikuara në këtë ligj.

6. Zonat urbane brenda perimetrit të zonës së mbrojtur të jenë pjesë e planit të menaxhimit të kësaj zone, duke u harmonizuar me rregullat e parashikuara nga planet e përgjithshme vendore dhe planet e detajuara urbane të miratuara.

7. Ministria përgjegjëse për zonat e mbrojtura, në bashkëpunim me ministritë e linjës, Bashkinë Himarë, publikun e interesuar, shoqërinë civile dhe pronarët privatë, prona e të cilëve përfshihet brenda territorit të zonës të mbrojtur, miraton planin e menaxhimit të Parkut Natyror dhe objektivat e ruajtjes së zonës, të hartuar nga Agjencia Kombëtare e Zonave të Mbrojtura, brenda 2 (dy) vjetësh nga data e hyrjes në fuqi të këtij vendimi.

8. Autoriteti shtetëror i ngarkuar për administrimin dhe mbikëqyrjen e zonës së mbrojtur është Agjencia Kombëtare e Zonave të Mbrojtura (AKZM).

9. Ngarkohet Ministria e Turizmit dhe Mjedisit, Agjencia Kombëtare e Zonave të Mbrojtura dhe Bashkia e Himarë për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama



ANEKS 1


Tabela 1. Sipërfaqja e PN-së e përshkruar sipas mbulesës

Mbulesa	Sip. në ha	Përqindja
Sipërfaqe ujore (detare)	1,490.40	87.90%
Sipërfaqe tokësore	204.58	0.45%
Totali	1694.98	100%

Tabela 2. Zonimi i brendshëm i Parkut Natyror

Zonimi	Sipërfaqe (ha)			Përqindja
	Det	Tokë	Totali	
Zona qendrore	269.21	154.98	424.2	25%
Zona e përdorimit tradicional	1221.18	41.92	1263.1	74.52%
Zona e rekreacionit	-	7.67	7.67	0.48%
Total			1694.98	100%

SHTOJCË 1

HARTA E ZONES SE MBROJTUR
PARKU NATYROR "PORTO PALERMO"



SHTOJCË 3
Zonimi në “Parkun Natyror” Porto-Palermo

